



АЗИЗ ҲАВОРИЙ ПАВЛУСНИНГ

ГАЛАТИЯЛИКЛАРГА МАКТУБИ

1-БОБ

Дуойи салом

¹ Инсонлар томонидан эмас, инсон орқали ҳам эмас, балки Исо Масих ва Уни тирилтирган Отамиз Худо томонидан хаворий қилиб тайинланган мен – Павлус, ²шунингдек, мен билан бирга бўлган ҳамма биродарлар Галатия^а ўлкасидаги Масих жамоатларига салом йўллаймиз. ³Отамиз Худодан ва Раббимиз Исо Масихдан сизларга иноят ила тинчлик бўлсин.

⁴Исо Масих бизни ҳозирги ёвуз асрдан кутқармоқчи бўлиб, гуноҳларимиз учун Ўзини фидо қилди, шу йўсин Отамиз Худонинг иродасини адо этди. ⁵Унга абадулабад шон-шарафлар бўлсин! Омин.

^а 1:2 ГАЛАТИЯ: Рим империясидаги вилоят, ҳозирги Туркиянинг шимолида жойлашган; қаранг: Ҳаворийлар 16:6, 18:23.

Инжил – ягона

⁶ Ҳайронман, сизлар қанчалик тез Масихнинг иноятли даъватидан юз ўгириб, бошқа бир «Инжил»га сажда қилдингизлар! ⁷ Аслида бошқа Инжил йўқ. Фақат баъзилар сизларни чалғитиб, Масих Хушхабарини бузиб кўрсатишни хоҳлайдилар. ⁸ Бордию биз ёки хатто осмондан бирор фаришта келиб, ўзимиз сизларга ўргатган Инжилдан бошқа бир «хушхабар» келтирса, лаънати бўлсин. ⁹ Биз олдин ҳам айтган эдик, ҳозир яна айтяпман: агар кимки сизлар қабул қилган Инжилга зид бўлган хабарни тарғиб этса, лаънати бўлсин!

¹⁰ Энди мен инсонлардан мактов излаяпманми, ёки Худоданми? Нахотки инсонларга ёқмоқчи бўлсам? Агар мен ҳали ҳам инсонларга ёқмоқчи бўлганимда эди, Масихнинг қули бўлолмас эдим!

Павлус хаворийлар қаторига киради

¹¹ Эй биродарлар, сизларга эълон қилмоқдаман: мен тарғиб этаётган Инжил инсон ижоди эмас. ¹² Чунки мен уни инсондан қабул қилмаганман ва ҳеч кимдан таълим олмаганман; балки Исо Масихдан ваҳий олганман.

¹³ Менинг яҳудий динида кечган илгариги ҳаётим ҳақида эшитгансизлар; Худонинг умматига хаддан ташқари жабр-зулм қилиб, уни вайрон қилар эдим. ¹⁴ Қавмимдан бўлган кўп тенгдошларимга қараганда, яҳудийликда хийла муваффақият қозонган эдим, ота-боболарим урф-одатларига ўта жонкуяр эдим. ¹⁵ Аммо Худо мурувват қилиб, онам қорнидаёқ мени танлаган, Ўз инояти билан мени даъват этган эди. ¹⁶ Мен дунё халқлари орасида Худо Ўғлининг Хушхабарини тарғиб қилишим учун, Худо Ўз вақтида Ўғлини менга зоҳир қилди. Шунда мен дарҳол одамзод билан маслаҳатлашмадим, ¹⁷ ўзимдан илғор хаворийларни кўргани Қуддусга бормадим. Балки Арабистонга кетиб, кейин яна Дамашққа қайтдим.

¹⁸ Сўнгра, уч йилдан кейин, Бутрус билан танишмоқ учун Қуддусга бордим ва унинг ёнида ўн беш кун бўлдим. ¹⁹ Лекин Раббимиз Исонинг укаси Ёқубдан^а бошқа хаворийларнинг ҳеч

^а 1:19 ЁҚУБ: Исонинг укаларидан бири, кейинчалик Қуддусдаги Масих жамоатига бош бўлган; яна қаранг: Марк 6:3, Ҳаворийлар 12:17, 15:13.

бирини кўрмадим. ²⁰ Мен сизларга нима ёзаётган бўлсам, Худо шохид, ёлгон эмас.

²¹ Ундан сўнг Сурия ва Киликия мамлакатларига бордим. ²² Яҳудия ўлкасидаги Масих жамоатлари эса мени шахсан танимас эдилар. ²³ Улар фақат: у бир вақтлар бизларга жабр-зулм қилиб юрган киши эди, энди илгари илдизи билан қуритмоқчи бўлган имонни ўзи тарғиб қилмоқда, деган гапларни эшиттар, ²⁴ мен учун Худони улуғлар эдилар.

2-БОБ

Бошқа ҳаворийлар Павлусни қабул қилади

¹ Кейинроқ, ўн тўрт йил ўтгандан сўнг, Барнабо билан бирга яна Қуддусга бордим, Титусни ҳам ёнимга олдим^а. ² У ерга ваҳий орқали бордим. Мен кўрсатган жаҳду жадалим пучга чиқмасин, деб кўркиб, уларнинг алоҳида эътиборли одамлари билан кўришдим, мажусийлар^б орасида ўзим тарғиб қилаётган Хушхабарнинг моҳиятини уларга баён этдим. ³ Улар эса хатто ҳамроҳим Титусни, юнон бўлишига қарамай, хатна бўлишга мажбур этишмади. ⁴ Фақат баъзи сохта биродарлар лип этиб орамизга суқилиб киришган эди. Улар бизга Исо Масих ато этган озодликни кўролмай, бизни яна қул қилмоқчи эдилар. ⁵ Биз эса Хушхабарнинг ҳақиқати сизлар билан абадий бўлсин деб, бир дам ҳам уларга ён бермадик.

⁶ Кимлар томонидандир эътиборли ҳисобланган одамларга келганда (улар бир вақтлар қандай бўлган бўлсалар, менга бари бир, Худо инсонга юз-хотир қилмайди), шуни айтай, ўша эътиборлилар менинг зиммамга бошқа ҳеч нарса юкламадилар. ⁷ Аксинча, улар Хушхабар Бутрусга аҳли суннат^с учун берилганини билиб, мен энди шу мақсадда суннатсизлар^д олдига юборилганимни тан олдилар. ⁸ Ахир, Худо аҳли суннатга ҳаворийлик қилаётган Бутрусда ҳам, мажусийларга

^а 2:1 қаранг: Ҳаворийлар 15-боб.

^б 2:2 МАЖУСИЙЛАР: луғатга қаранг.

^с 2:7 АҲЛИ СУННАТ: яҳудийлар.

^д 2:7 СУННАТСИЗЛАР: ғайрияҳудийлар; яна қаранг: Римликлар 3:28-30, 4-боб.

хаворийлик қилаётган менда ҳам амал қилиб келмоқда. ⁹ Шундай қилиб, имонлилар жамоатининг устунлари ҳисобланган Ёқуб, Кифа^а ва Юханно Худо менга бу иш учун алоҳида иноят берганига ишонч ҳосил қилдилар. Улар биз мажусийларнинг олдига кетайлик, қолганлар эса аҳли суннатнинг олдига кетсин, деб келишдилар ва мен билан Барнабога бирдамлик қўлини бердилар. ¹⁰ Улар фақат биз камбағалларни эрдан чиқармаслигимизни илтимос қилдилар, буни шахсан мен бажо келтиришга жон қуйдирдим.

Яҳудийлик ва Илоҳий Қонун

¹¹ Бутрус Антиохия шаҳрига келганда, унинг хатолигини юзига айтиб фош қилдим. ¹² Чунки *Қуддусдан*, Ёқубнинг ёнидан баъзи одамлар келишидан аввал Бутрус мажусийлар билан бирга еб-ичиб юрган эди. Аммо у одамлар келгач, суннатчилардан^б хавотирланиб, ўзини четга олди ва мажусийлар билан алокани узди. ¹³ Шунда бошқа яҳудийлар ҳам Бутрусга ўхшаб риёкорлик қилишди, хатто Барнабо ҳам улар риёкорлигининг қурбони бўлди. ¹⁴ Мен эса улар Инжил ҳақиқати бўйича ҳаракат қилишмаётганини кўриб, ҳаммага эшиттириб Бутрусга: «Агар сен яҳудий бўла туриб, яҳудийлар каби эмас, мажусийлар каби яшаётган бўлсанг, қандай қилиб мажусийларни яҳудийлашмоққа мажбур этяпсан?» — дедим.

¹⁵ Тўғри, бизлар асл яҳудиймиз, мажусийлар сингари гуноҳкор эмасмиз. ¹⁶ Лекин шуни биламизки, Худо Илоҳий Қонунга амал қилган кишини эмас, Исо Масихга ишонган кишини оқлайди. Шунинг учун бизлар ҳам Илоҳий Қонунга амал қилиш билан эмас, Масихга ишониш билангина оқланамиз, деб Исо Масихга қаттиқ ишонганмиз. Ҳеч ким Илоҳий Қонунга амал қилиб, Худо олдида ўзини оқлаёлмайди.

¹⁷ Бундан кўринадики, Масих орқали оқланишни излаган ўзимиз ҳам ҳамма одам қатори гуноҳкор бўлиб чиқдик. У ҳолда, Масих гуноҳ йўлининг ҳомийси экан-да? — Асло!

¹⁸ Агар мен ўзим қулатган *қонун-қоидалар* биносини қайтадан

^а 2:9 КИФА: Симун Бутруснинг янги исми; қаранг: Матто 16:18, Юханно 1:42.

^б 2:12 СУННАТЧИЛАР: луғатга қаранг.

қуришга киришсам, унда мен ўзимнинг қонунбузар эканимни кўрсатган бўламан. ¹⁹ Бирок энди мен Худо учун яшай деб, Қонун олдида ўлганман, ҳа, Қонун ўзи мени ўлдирди^а. Мен Масих билан бирга хочга михлаб қўйилганман. ²⁰ Энди яшаётган мен эмас, балки Масих менинг ичимда яшаяпти. Энди танада яшаётганимга келсак, мени севган ва мен учун Ўзини фидо қилган Худонинг Ўғлига бўлган имон билан яшаяпман. ²¹ Мен Худонинг иноятини инкор қилмайман. Агар Илохий Қонунга амал қилиш билан оқланиш мумкин бўлганда эди, у холда Масих беҳуда ўлган бўларди.

3-БОБ

Илохий Қонун ва имон

¹Эй бефаҳм галатияликлар! Ҳақиқатга бўйсунмаслик учун сизларни ким сеҳрлаб қўйди? Сизларнинг кўз ўнгингизда Исо Масихнинг хочга михлаб қўйилгани аниқ тасвир этилмаганмиди? ²Сизлардан бир нарсанигина билмоқчиман, сизлар Муқаддас Рухни қандай қабул қилдингизлар: Таврот Қонунига амал қилиш биланми ёки имон тўғрисидаги хабарни эшитиш биланми? ³Сизлар шунчалик фаҳмсизмисизлар? Муқаддас Рух кучи билан бошлаб, энди ўзингизнинг башарий кучингиз билан битирмоқчимисизлар? ⁴Бекорга шунча синовлардан ўтдингизларми? Ҳақиқатан ҳам бекорга эдимиз? ⁵Худо сизларга Ўз Рухини бахш этиб, орангизда ажойиб мўъжизалар яратмоқда. У буни Қонунга амал қилганингиз учун қиялтими ёки эшитганларингизга имон келтирганингиз учунми?

Иброҳим пайғамбарнинг ибратли имони

⁶Иброҳим пайғамбардан ибрат олайлик: У Худога ишонди ва шунинг учун оқланди. ⁷Шундан билингларки, ким имонга эга бўлса, у Иброҳимнинг ўғли саналади. ⁸Худо Иброҳимга: «Бутун халқлар сендан барака топажаклар»^б деб, унга даставвал Хушхабар келтирган эди. Тавротнинг ана шу ояти аниқ

^а 2:19 ЎЛДИРДИ: яна қаранг: Римликлар 7:1-6.

^б 3:8 қаранг: Ибтидо 12:3, 18:18, 22:18, Ҳаворийлар 3:25.

кўрсатадики, Худо инсонни миллатига қарамай, имони туфайли оқлайди. ⁹Имон соҳиби Иброҳим пайғамбарга шундай эргашган ҳамма ахли имон худди Иброҳимдай Худо раҳмати-га эришади.

¹⁰Илоҳий Қонунга амал қилдим, деб ўзини оқламокчи бўлган барча кишилар лаънат остидадирлар. Чунки Тавротда шундай ёзилган: «Қонун китобининг ҳар бир моддасига қаттиқ риоя қилмайдиган барча лаънати бўлади». ¹¹Шундай экан, Илоҳий Қонунга амал қилиш билан ҳеч ким Худо олдида ўзини оқлаёлмаслиги аниқдир. *Тавротда ёзилганидек*: «Имони билан оқланган киши яшайверади». ¹²Қонунга амал қилиш эса имонга боғлиқ эмас, аксинча, *Тавротда*: «Бу буйруқларни бажо келтирган киши шу билан яшайверади», деб ёзилган.

¹³Масих эса биз учун лаънатланиб, бизни Қонун лаънатидан халос қилди, худди Тавротда ёзилганидек: «Ёғочга осилган ҳар бир киши лаънатидир». ¹⁴Шу йўсин Худо Иброҳимга ваъда қилган кут-баракалар Исо Масих орқали мажусийларга ҳам насиб этди, биз имонимиз туфайли Худо ваъда берган Муқаддас Рухни қабул қилдик.

Илоҳий Қонун ва Худонинг ваъдаси

¹⁵Биродарлар! Одамлар ҳаётидан бир мисол келтирай: одам қилган васиятни ҳеч ким бекор қилолмайди ва унга қўшолмайди. ¹⁶Худонинг Иброҳим ва унинг зотига берган улуғ ваъдалари бундан кам эмас. Худо Иброҳимга: «Сенинг зотларингга бераман» деб, кўпчилик ҳақида гапирмади, аксинча: «Сенинг зотингга бераман» деб, битта кишини, яъни Масихни кўзда тутди. ¹⁷Шуни айтмоқчиманки, Илоҳий Қонун Иброҳимдан тўрт юз ўттиз йил кейин пайдо бўлган бўлса-да, Худонинг Иброҳим билан олдинроқ тасдиқлаган аҳдини ўртадан кўтармади, Худонинг Масих ҳақида берган ваъдасини бекор қилмади. ¹⁸Агар мерос^а Қонунга амал қилиш шарти билан берилганда эди, ваъда бекорга чиққан бўлур эди. Аммо Худо меросни Иброҳимга ваъда бўйича ато қилди.

^а ^{3:18}МЕРОС: Худо Иброҳимга ваъда қилган мамлакат ва унинг баракалари (қаранг: Ибтидо 12-боб, Римликлар 4-боб); абадий меросимиз — жаннат саодати рамзидир

¹⁹ У ҳолда Илоҳий Қонун нима учун берилган? Илоҳий Қонун гуноҳкорлигимизни очик кўрсатиш учун, илоҳий ваъдага кўшимча қилиб берилган. Ваъдани олган Иброҳим Зоти келмагунча, бу Қонун жорий бўлиши керак эди. Илоҳий Қонун фаришталар орқали берилган, воситачи^а эса уни халққа эълон қилган. ²⁰ Ваҳоланки, битта одам иш қилганда, воситачи керак бўлмайди. Худо эса биттадир.

Илоҳий Қонуннинг ғояси

²¹ Демак, Илоҳий Қонун Худонинг ваъдаларига зидми? — Асло! Агар *абадий* ҳаёт ато қилишга қодир бир Қонун берилган бўлса эди, унда шубҳасиз Қонунга амал қилиш билан оқланса бўлар эди. ²² Аммо Муқаддас Китоб бутун борликни гуноҳнинг ҳокимияти остида деб эълон қилган. Демак, илоҳий ваъда фақат Исо Масихга ишониш орқали рўёбга чиқади ва барча имонлиларга насиб этади.

²³ Бўлғуси имон пайдо бўлишидан аввал, биз бу имоннинг ваҳий қилинишини кутиб турган тутқунлардай эдик, Илоҳий Қонун назорати остида қамаб қўйилган эдик. ²⁴ Бошқача айтганда, биз имон билан оқланишни кутар эканмиз, Қонун Масихга бошловчи мураббийимиз бўлган. ²⁵ Лекин имон пайдо бўлганидан сўнг, биз энди Қонуннинг тарбиясида эмасмиз.

²⁶ Шундай қилиб, сизлар, Исо Масихга ишонган ҳамма, Худонинг ўғилларисизлар. ²⁷ Сизлар Масихни тан олиб, сувда имон келтирдингизлар ва ҳар бирингиз Масихни кийиб олдингизлар^б. ²⁸ Энди на яҳудий бор, на юний, на кул бор, на озод, на эркак бор, на аёл. Сиз Исо Масих уммати бўлганингиз учун, ҳаммангиз бирсизлар. ²⁹ Агар Масихники бўлсангизлар, у ҳолда Иброҳимнинг ҳам зурриётисизлар, шунингдек, Худо Иброҳимга ваъда қилган меросдан баҳрамандсизлар.

^а 3:19 ВОСИТАЧИ: яъни Илоҳий Қонунни қабул қилган Мусо пайғамбар.

^б 3:27 МАСИХНИ КИЙИБ ОЛДИНГИЗЛАР: яъни янги, пок либос кийгандек, Масихни поклигингиз, зеб-зийнатингиз қилиб қабул қилдингизлар; яна қаранг: Римликлар 6:3-4 ва 13:14, Колосаликлар 3:9-10.

4-БОБ

Биз кул эмас, ўғилу ворисмиз

¹ Яна шуни айтайин: меросхўр хали ёш бола экан, гарчи у хамма нарсанинг хўжайини бўлса ҳам, кулдан ҳеч фарқ қилмайди. ² У отаси белгилаган фурсатгача васий ва уй-рўзғор бошқарувчи хизматкорга бўйсунди.

³ Бизлар ҳам худди бунга ўхшаб, болалик чоғимизда дунёнинг хурофий кучларига кул эдик. ⁴ Лекин замона охирлаб қолганда, Худо Ўз Ўғлини юборди. У хотиндан туғилиб, Қонунга бўйсуниб юрди, ⁵ токи бизни Қонунга кул бўлишдан қутқарсин ва ўғилликка қабул қилсин. ⁶ Энди сизлар Худога ўғил бўлгандан кейин, Худо Ўз Ўғли Исонинг Рухини юракларингизга юборди. Бу Рухдан рухланиб, биз Худони азиз Ота^а деб қақирамиз. ⁷ Демак, сен бошқа кул эмассан, балки ўғилсан. Ўғил бўлганинг учун, Худо Исо Масих шарофати билан сени ворис^б деб ҳам қабул қилган.

Павлуснинг галатияликлардан ташвишлиниши

⁸ Ўтмишда сизлар Худони билмай, аслан худо бўлмаган кучларга кул бўлгансизлар. ⁹ Энди эса Худони таниб-билиб олдингизлар, яна тўғриси, Худо тарафидан таниб-билиндингизлар. Шундай экан, қандай қилиб яна ўша кучсиз ва қадрсиз хурофотларга қайтыпсизлар? Янгитдан кулликка берилмоқчимисизлар? ¹⁰ Сизлар алоҳида кун, ой, фасл ва йилларни мушоҳада қиляпсизлар. ¹¹ Наҳотки сизлар учун шунча беҳуда заҳмат чеккан бўлсам, деб хавотирланияпман.

¹² Эй биродарлар, сизлардан илтимос қиламан, мендай бўлинглар, чунки мен ҳам сизлардай бўлган эдим. Сизлар менга ҳеч ҳам озор бермас эдингизлар. ¹³ Эсингиздан чиқмасин, мен сизларга Хушхабарни биринчи марта билдирганимда, жисман

^а 4:6 АЗИЗ ОТА: аслида «Абба, Ота» (Абба арабий тилида «севикли Ота» демақдир); яна қаранг: Римликлар 8:15-17.

^б 4:7 ВОРИС: самовий Отамиз бизни ўғилларим деб, абадий хузур-ҳаловатдан баҳраманд қилишини билдиради; яна қаранг: Римликлар 8:14-17; 1-Юханно 3-боб.

ожиз эдим. ¹⁴Ожизлигим сизлар учун бир синов бўлгани ҳолда, мендан жирканмай, силтаб юбормадингизлар, балки мени Худонинг фариштасидай, Исо Масих каби қабул қилдингизлар. ¹⁵Қани энди сизнинг ўша пайтдаги бахтиёрлигингиз? Ўзим сизларга шоҳидман: агар бу мумкин бўлса эди, ўша пайтда сиз ўз кўзларингизни суғуриб олиб, менга беришга тайёр эдингизлар! ¹⁶Энди мен сизларга ҳақиқатни айтиб, душманингиз бўлдимми?

¹⁷Сизларни қўлга олиш учун ҳаракат қилаётганларнинг нияти яхши эмас. Улар сизларни қойил қолдириб, биздан ажратиб олмоқчилар. ¹⁸Ният холис бўлса, қойил иш яхшидир. Фақат бу мен сизларнинг ёнингизда ҳозир бўлганимдагина эмас, балки доимо шундай бўлмоғи лозим. ¹⁹Болаларим, Масих сизларда гаваданмагунча, мен сизларни янгитдан туғайтгандай, тўлғоқ азобидаман. ²⁰Мен ҳозир ёнингизда бўлиб, гапимнинг оҳангини ўзгартирмоқчи эдим, чунки сизларни нима қиларимни билмай, эсанкираяпман.

Ҳожар биби ва Соро биби мисоли

²¹Эй сизлар, Қонун бандалари бўлишни истаганлар, менга айтинглар-чи, нахот сиз Қонунга^а қулоқ солмайсизлар? ²²Мана Қонунда: Иброҳим икки ўғилли бўлган, бири чўридан, бошқаси озод, ўз хотинидан эди, деб ёзилган. ²³Чўрисиники табиат қондаларига биноан, озод хотининики эса илоҳий ваъдага биноан туғилган эди. ²⁴Бунда рамзий маъно бор. Икки она икки аҳдни билдиради: биринчиси, қуллар туғадиган Ҳожар биби – Худо Синай тоғида қилган аҳднинг^б рамзидир. ²⁵Ҳожар сўзи Арабистондаги Синай тоғини билдирса-да, ҳозирги Қуддуснинг рамзидир; чунки Қуддус ва унинг болалари ҳозир қул бўлиб хизмат қилмоқдалар. ²⁶Бироқ кўкдаги Қуддус^с эса озоддир: у бизларнинг ҳаммамизга она. ²⁷Мана, Тавротда бундай ёзилган:

^а 4:21 ҚОНУН: яъни Таврот; қаранг: Ибтидо 16 ва 21–боблар.

^б 4:24 АҲД: Худованд Синай тоғида Мусо пайғамбарга Тавротни йўллаб, Исроил халқи билан аҳд қилган; яна қаранг: Ҳаворийлар 7:20–38, Забур 67:9.

^с 4:26 КЎКДАГИ ҚУДДУС: самодаги абадий юртимиз рамзи; яна қаранг: Ваҳий 3:12, 21:2.

«Эй туғмайдиган, наслсиз аёл, шод бўлгил!
 Кувончларга тўлиб хитоб қилгил,
 Эй тўлғоқ азобин чекмаган!
 Зеро никоҳли аёлнинг ўғилларидан кўра,
 Ташлаб кетилганнинг ўғиллари кўп бўлди».

²⁸ Биз эса, биродарлар, Исоққа ўхшаб, илохий ваъда бўйича туғилган ўғиллармиз. ²⁹ Ўша вақтда табиий йўл билан туғилган *Исмоил* илохий ваъда бўйича туғилган Исоққа зулм этди. Ҳозир ҳам худди шундай. ³⁰ Аммо Тавротда нима дейилади? — «Чўрини ва унинг ўғлини ҳайдаб юборгин. Чунки чўрининг ўғли озод хотиннинг ўғли билан барабар ворис бўлолмайди».

³¹ Шундай қилиб, эй биродарлар, биз чўрининг эмас, балки озод хотиннинг фарзандимиз.

5-БОБ

Яна кулликка қайтманглар!

¹ Шундай қилиб, Масих бизга берган эркинликни маҳкам тутинглар, қайтадан куллик бўйинтуруғини такманглар. ² Буни мен, Павлус, сизларга гапиряпман: агар сизлар суннат қиладиган бўлсангизлар, Масих сизларга фойда қилмайди. ³ Хатна бўладиган ҳар бир одамга яна таъкидлаб айтаман: у бутун Илохий Қонунни бажаришга мажбурдир. ⁴ Сизлар: Қонунга амал қилиб ўзимизни оқлаймиз, деб Масихдан ажралгансизлар ва Худо иноятдан маҳрум бўлгансизлар. ⁵ Бизлар эса *Илохий* Рухдан умидвор бўлиб, имонимиз асосида оқлашимизни кутамиз. ⁶ Исо Масих йўлида на суннат, на суннатсизлик бирон ишга ярамайди, фақат муҳаббат билан амал қилувчи имон ярайди.

⁷ Сизлар яхшигина қадам отаётган эдингизлар. Шундай экан, ҳақиқатга итоат қилишингизга ким халақит берди? ⁸ Сизнинг бу инонувчанлигингиз сизни Даъват қилувчидан бўлмади! ⁹ Озгина хамиртуруш бутун хамирни ачитади!

¹⁰ Раббим ҳақи ишончим комилки, сизлар бу хусусда бошқача фикр қилмайсизлар. Фикрингизни чалғитувчи ким бўлмасин, шунга яраша жазосини олади. ¹¹ Биродарлар, мен хали ҳам суннатни тарғиб этаётган бўлсам, нима учун хануз таъкибларга

дучор бўлмоқдаман? Ундай бўлса, хоч васвасаси йўққа чиқар эди-ку! ¹² Қанийди сизларни бу гап билан изтиробга солувчилар ўзларини бичишса!^a

¹³ Эй биродарлар, сизлар эркинликка чорлангансизлар. Фақат бу эркинликни нафсингиз учун қурбон қилманглар, балки бир-бирингизга муҳаббат билан хизмат қилинглар. ¹⁴ Чунки Илоҳий Қонуннинг ҳаммаси бир сўзда жамланади, яъни: «Ўзгани ўзинг каби севгин». ¹⁵ Аммо сизлар бир-бирингиз билан тишлашиб, ғажишсангизлар, эҳтиёт бўлинглар, тагин бир-бирингизни еб битирманглар!

Инсон табиати ва Худо Рухи

¹⁶ Мен шуни айтмоқчиман: Илоҳий Рух амри билан яшанглар, шунда табиатингиздаги ёмон эҳтирослар жунбишга келмайди. ¹⁷ Чунки инсон табиати Илоҳий Рухга, Илоҳий Рух эса инсон табиатига қарши йўналтирилган. Бу иккови бир-бирига душман бўлгани учун, сизлар истамаганингизни қиласизлар. ¹⁸ Агар сиз Рух амри остида яшаётган бўлсангиз, унда Қонун амри остида эмассизлар.

¹⁹ Башарий табиатнинг^b ишлари маълум, чунончи: фахш-бозлик, харом-харишлик, фиққ-фужур, ²⁰ бутпарастлик, жодугарлик, душманлик, жанжалкашлик, рашк-ғазаб, манманлик, ихтилофчилик, бидъатчилик, ²¹ ҳасад, котиллик, ичкиликбозлик, айш-ишрат ва шуларга ўхшаган ишлар. Сизларни олдин огоҳлантирган эдим, яна огоҳлантиряпман: бу каби ишларни қилувчилар Худо Шохлигидан бебаҳра бўладилар.

²² Илоҳий Рухнинг самараси эса — муҳаббат, севинч, хотиржамлик, сабр-тоқат, лутфкорлик, хайрихоҳлик, садоқат,

^a 5:12 Суннат (хатна) ўзи-ўзидан ёмон эмас. Бу сўз суннатни савобли иш ҳисоблаб, шу тариқа Худонинг марҳаматига эришмоқчи бўлганлар учун айтилган. Худонинг марҳамати эса фақат Исо Масихнинг қурбонлигига ишонганларга насиб этади. Суннат хусусида яна қаранг: Ибтидо 17-боб, Ҳаворийлар 15-боб ва 16:3, Римликлар 4-боб, 1-Коринфликлар 7:18.

^b 5:17-19 ИНСОН ТАБИАТИ...БАШАРИЙ ТАБИАТ: ёки, вужуд, нафс (Худодан қайтган инсониятнинг ёмон рухий ҳолатини билдиради); яна қаранг: Римликлар 7—8-боблар.

²³ мулойимлик ва ибодир. Бу хислатларга қарши бирор қонун йўқ. ²⁴ Исо Масихга тегишли бўлганлар эса ўз табиати-ни, хирсу эҳтирослари билан бирга, хочга михлаб қўйганлар. ²⁵ Агар биз Рух амри остида бўлсак, Рух амри билан умр кечиримиз лозим. ²⁶ Шуҳратпараст бўлмайлик, бир-биримиздан рашк қўзғамайлик, бахиллик қилмайлик.

6-БОБ

Яхшилик қилишдан безмайлик

¹ Эй, Рух амри билан яшаётган биродарларим, агар бирон одам гуноҳ қилиб қўйса, уни мулойим рух билан тузатинглар. Унга ўхшаб васвасага йўлиқмаслигингиз учун ўзингизга эҳтиёт бўлинг. ² Бир-бирингизнинг оғирликларингизга ёрдамлашинглар, шундай қилиб Масихнинг Қонунини бажарган бўласизлар.

³ Агар бирор киши, гарчи ҳеч нарса бўлмаса ҳам, ўзини муҳим киши ҳисобласа, у ўз-ўзини алдаган бўлади. ⁴ Ҳар ким ўз ишини муҳокама қилсин, шунда бошқанинг ишига қараб эмас, ўз ишига қараб таҳсин олади. ⁵ Зотан ҳар ким ўз арава-сини ўзи тортиши лозим.

⁶ Илоҳий Каломдан таълим олувчи таълим берувчи билан ҳар қандай эзгуликни баҳам кўрсин.

⁷ Адашманглар, Худо ҳақоратланмайди. Инсон нима экса, шуни ўради. ⁸ Ўз нафси даласига уруғ экса, нафсдан завол ўриб олади. Рух даласига уруғ экса, Рухдан абадий ҳаёт ўриб олади. ⁹ Шундай экан, яхшилик қилишдан безмайлик. Агар бўшашмасак, ўз вақтида бунинг ҳосилини ўриб оламиз. ¹⁰ Фурсатимиз бор экан, ҳаммага, айниқса, ўзимизнинг аҳли мўминга яхшилик қилаверайлик.

Масихнинг хочи – бизнинг фаҳримиз

¹¹ Менинг қўлимга қаранглар, сизларга қандай катта ҳарфлар билан ёздим!

¹² Сизларни суннат бўлишга кистаётган ўша кишилар фақат сиртдан яхши таассурот қолдирмоқчилар, Масихнинг хочи учун таъқибга дучор бўлмаслик учун шундай ҳаракат қиляптилар. ¹³ Ҳолбуки, аҳли суннатнинг ўзлари ҳам Илоҳий

Қонунга риоя этмайдилар. Улар фақат сизларнинг таналарингиз билан мақтанмоқ учун хатна бўлишингизни истайдилар.

¹⁴ Мен эса, асло биргина Раббимиз Исо Масихнинг хочидан бошқа ҳеч нарса билан мақтанмайман. Унинг хочи туйфайли бу дунё мен учун ўлган, мен эса бу дунё учун ўлганман. ¹⁵ Исо Масих йўлида суннатнинг ҳам, суннатсизликнинг ҳам ҳеч ахамияти йўқ. Ахамиятлиси — янгидан яратилишдир^а. ¹⁶ Бу қоидага кўра яшаётганларнинг ҳаммасига ва Худонинг Исроилига^б тинчлик ва раҳмат бўлсин!

¹⁷ Бундан кейин ҳеч ким менга оғирлигини солмасин. Чунки мен Раббим Исонинг жароҳатларини ўз танамда олиб юрибман.

¹⁸ Эй биродарлар, Раббимиз Исо Масихнинг инояти руҳингизга ёр бўлсин. Омин.

^а 6:15 ЯНГИДАН ЯРАТИЛИШ: Худо яратадиган янги инсон, Коло-саликлар 3:10 даги изоҳга қаранг; яна қаранг: Римликлар 6:3-4, 2-Коринфликлар 5:17, Эфесликлар 4:24, Вахий 21:5.

^б 6:16 ХУДОНИНГ ИСРОИЛИ: Қутқарувчи Исо Масихга ишониб, «ҳақиқий исроиллик» ҳисобланган яҳудийлар бўлса керак.